

innocentis vulneratum abscentem curat; vel puerum ponit super
visum, ne timeat.

C A P V T VI.

De remediis non superstitiosis, seu licitis.

Superstitiosum non est 1. si quis potius colligat herbas in
solstitio; purget corpus vere. 2. si ferat reliquias, amuleta
causâ deuotionis, ex fiducia erga Deum & Sanctos, omittis
superstitiosis ceremoniis, & vanis obseruantis, quibus existi-
maret esse contra vulnera, vel subitam mortem, &c. 3. si obser-
uat galli cantum, non ea existimatione, quasi vim haben-
tem ex se ad destruenda maleficia, sed prout indicat domini-
cam Resurrectionem, S. Petri pœnitentiam, vel futuras po-
pulorum preces, à quibus valde dæmon abhorret, & fuga-
tur cantum illum audiendo, utpote qui lucem odit, & fugit,
cum *lumina nocte canit prædicans impiger ales.* 4. si circumdu-
cat nouies iumenta ad templum S. Antonij, vel ipsemet cir-
cumeat circa sepulcrum B. Petri de Arbues, vel die alicuius
sancti eis venam fecerit: vel faciat annulum ex primo nummo
in Parasceue oblato, si tamen hæc faciat ut se magis excitet
ad precandum ob diem sancto dedicatum, vel ob affectum,
quem habet specialiter erga sanctum, à quo opem & auxi-
lium sperat. Aliud tamen esset, si crederet tales circumstantias
infallibiles aut planè necessarias aut per se efficaces.

Tollendi tamen sunt tales usus, & omnes ceremoniæ ab
Ecclesia non receptæ, si id commodè fieri possit, tanquam ij,
qui superstitionem vanam redolent: at si commodè tolli non
possunt, non sunt condemnandi, sed simplices docendi sunt,
ut habeant rectam intentionem, sic enim non committent va-
nam obseruantiam. Nec damnandæ aliquæ consuetudines, si
sint ex deuotione, nullumque sequatur scandalum, ut si in
memoriam alicuius mysterij v. g. nouem mensium, quibus
Christus fuit in utero, nouem, vel ad exemplum S. Gregorij
30. Missæ celebrentur cum certo cereorum numero; modò
non ita fides colloccetur in eo numero, ut non liceat illum
augere aut minuire.